

Tamiflu-dálkkodeapmi divššohasaide geain sáhtta leat influenza A(H1N1)

Jus dus lea influenza, de sáhtta dálkkodeapmi Tamiflu-dálkasiin oanidit buohcanáiggi ja unnidit komplikašuvdnávára jus dálkkodeapmi álggahuvvo nu jođánit go lea vejolaš maŋnel go leat buohccán.

Dearvvašvuođa- ja fuolahusdepartementa lea ásahan gaskaboddosaš ortnega mii addá maiddá farmaseuttaide vuoigatvuođa čálihit Tamiflu ja Relenza. Ovdal go oaččut dálkasa, de fertet deavdit iešdieđáhuskovi.

Tamiflu olbmuide geat leat riskajoavkkus

Jus don gulat riskajoavkkuide ja jus dus lea feber ja eará dávdamearkkat nu go goikegosahat, searggahat, čottabávččas dahje njunni golgá, de ávžžuhit dearvvašvuođaeiseválddit álggahit Tamiflu-dálkkodeami nu jođánit go lea vejolaš (maŋemustá 48 diimmu sisa) maŋnel go leat buohccán ovttain dahje mánggain namuhuvvon dávdamearkkain. Dát lea erenoamáš dehálaš jus dieđát ahte earáin du lagasbirrasis lea influenza.

Olbmot geat eai gula riskajoavkkuide

Jus dus lea feber ja eará dávdamearkkat nu go goikegosahat, searggahat, čottabávččas dahje njunni golgá, de sáhtát maiddá don oažžut Tamiflu-dálkasa jus háliidat. Jus mángasis du lagasbirrasis lea influenza, de lea vejolaš ahte dus maid lea dát dávda jus dus leat ovdalis namuhuvvon dávdamearkkat. Jus Tamiflu-dálkkodeapmi galgá ábuhit, de lea dehálaš álggahit dálkkodeami nu jođánit go lea vejolaš (maŋemustá 48 diimmu sisa) maŋnel go leat buohccán.

Eastadandálkkodeapmi Tamifluain

Dearvvašvuođaeiseválddit ávžžuhit čađahit eastadandálkkodeami Tamifluain olbmuide geat gullet riskajovkui jus muhtumis sin lagasolbmuin lea influenza. Áhpeheamit ávžžuhuvvojit čađahit eastadandálkkodeami Relenzain jus muhtumat sin lagasolbmuin buohccájit influensain. Áhpeheamit ožžot Relenza apotehkas seammaládje go Tamiflu.

Goas galggat váldit oktavuoda doaktáriin

Jus leat duohta buohcci, de galggat álo váldit oktavuoda iežat fástadoaktáriin dahje doavttirvávttain.

Tamiflu-dáلكasa olggosaddin

Jus galggat oažžut Tamiflu doaktára reseptta haga, de fertet deavdit iešdieđáhuskovi mas leat dieđut buozanvuodaid birra ja maddái persovnnalaš dieđut (earret eará persovdnanummar). Dát lea dárbbalaš danne go lea gáibádus ahte Tamiflu-dálkkodeapmi čállojuvvo journálie. Skovi sáhtát viežžat interneahras, www.pandemi.no (duorastaga skábmamánu 5. beavvi rájes) dahje oaččut dan apotehkas.

Jus it beasa apotehkii jándora sisa maŋnel go buohccájit, de sáhtát váldit oktavuoda doavttirvávttain gos maddái sáhtát oažžut Tamiflu. Muhtun apotehkat dollet sotnabeivviid maid rabas.

Buohcci ii dárbbalaš ieš buktit iešdieđáhuskovi apotehkii. Don sáhtát viežžat Tamiflu earáide, ovdamearkka dihte jus muhtun bearrašis lea buohcci. Don fertet buktit iešdieđáhuskovi guđege olbmo ovddas geasa vieččat Tamiflu.

Táksta ja haddi

Ásahuvvo maddái gaskaboddosaš ortnet mas lea vuoliduvvon máksu dálkasiid ovddas, 50 kr Tamiflu ovddas ja 51 kr Relenza ovddas. Divššohasat geain ii leat doaktára resepta, fertejit dasa lassin máksit 20 kr go apotehka galgá rekvireret dálkasiid. Divššohasat geat geavahit dán ortnega apotehkas, šaddet nappo máksit sullii 70 ruvno guđege dálkkaspáhka ovddas. Dát vuoliduvvon iešmáksu dálkasiid ovddas lea sierra ortnet pandemiija oktavuodas, ja dasto ii sáhte divššohas geavahit friddjakoartta.